

摘藻堂四庫全書薈要

集部

欽定四庫全書薈要

集部

御定詠物詩選卷三百

十八至
二十六

詳校官原任主事
臣李斯咏

欽定四庫全書薈要卷一萬八千九百四十集部

御定佩文齋詠物詩選卷三百十八

海棠花類 附秋海棠

五言古

山館觀海棠

宋朱子

景暄林氣深雨罷寒塘綠置酒此佳晨尋幽慕前躅芳
樹麗煙華紫綿散清馥當由懷別恨寂寞向空谷

海棠

金元好問

妍花紅粉妝意態工媚嫵窈窕春風前霞衣欲輕舉金
盤渺華屋國豔徒自許依依如有意脉脉不得語詩人
太冷落愁絕殘春雨

七言古

和劉德彝海棠

元袁士元

主人愛花勝愛珠春風庭院如畫圖褰衣曲徑步花影
翩翩夜月飛長裾海棠睡起春正美花貌參差玉人似
主人吟賞夜不眠直欲題詩壓蘇子

題海棠

元陳樵

東風吹墮絳雲影
別院春遲宮漏永
繡帷寶帶綰流蘇
夢入瑤臺呼不醒
熒熒銀燭花蘂多
城頭烏啼奈曉何

五言律

垂絲海棠

宋梅堯臣

要使吳同蜀須看
線海棠胭脂色
欲滴紫蠟蒂何長
夜雨偏宜著春風
一任狂當時杜子
美吟徧獨相忘

山館觀海棠

宋朱子

春草池塘綠忽驚花嶼紅亂英深淺色芳氣有無中置
酒賓朋集披襟賞詠同若非摹寫得應逐綵雲空

海棠畫扇

明薛蕙

西蜀繁花樹春深亂蘂紅還憐彩扇上宛似錦城中影
轉團團月香含細細風江淹才力減賦爾若為工

雨中看垂絲海棠

明王叔承

江花低拂座窈窕雨中枝濕翠籠芳樹嬌紅裊碧絲驪
山清夜處越水浣紗時可奈風前態迷春暎酒卮

五言排律

海棠

唐薛能

酷烈復離披，元功莫我知。
青苔浮落處，暮柳開時帶。
醉遊人插連陰被，吏移晨前清露濕。
晏後惡風吹香少，傳何許妍多畫半遺。
島蘇連水脉，庭綻粒松枝。
偶泛因沈硯，閒飄欲亂碁。
遠山生玉壘，和郡徧坤維。
負賞慙休飲，牽吟分失飢。
明年應不見，留此贈巴兒。

七言律

海棠

唐李紳

海邊佳樹生奇彩，知是仙山取得栽。
瓊蘂籍中聞閬苑，紫芝圖上見蓬萊。
淺深芳萼通宵換，委積紅英報曉開。
寄語春園百花道，莫爭顏色泛金杯。

海棠

唐鄭谷

春風用意勻顏色，銷得攜觴與賦詩。
穠豔最宜新著雨，嬌嬈全在欲開時。
莫愁粉黛臨窗懶，梁廣丹青點筆遲。
朝醉暮吟看不足，羨他蝴蝶宿深枝。

擢第後入蜀經羅邛谿路見海棠盛開偶有題

詠

鄭谷

上國休誇紅杏豔深谿自照綠苔磯一枝低帶流鶯睡
數片狂和舞蝶飛堪恨路長移不得可無人與畫將歸
手中已有新春桂多謝煙香更入衣

海棠花

宋
劉子翬

幽姿淑態弄春晴梅借風流柳借輕刺種直教圍野水
半開長是近清明幾經夜雨香猶在染盡臙脂畫不成

詩老無心為題拂至今惆悵似含情

海棠

宋楊萬里

小園不到負今晨晚喚嬌紅伴老身落日爭明那肯暮
豔妝一出更無春樹間露坐看搖影酒底花光併入脣
銀燭不燒渠不睡梢頭恰恰挂冰輪

春晴懷故園海棠

楊萬里

故園今日海棠開夢入江西錦繡堆萬物皆春人獨老
一年過社燕方回似青如白天濃淡欲墮還飛絮往來

無奈春光餐不得遣詩招入翠瓊杯

海棠盛開而雨

宋方岳

閉門十日雨淋漓洗盡紅香了未知纔一霎晴齊睡去
幾何人見半開時世無解語玉條脫春欲負予金屈卮
自是晦明天不定非干工部欠渠詩

黃海棠

金蔡松年

清陰不歎晚尋芳縹緲湘雲翠袖長萼綠江花輸帶葉
醉紅蜀豔恨無香南州氣味連三月東晉風流共一觴

老眼寒來易淒絕幾疑新柳暎斜陽

和劉朔齋海棠

元年 嶽

人物當今第一流以花為屋玉為舟曉妝未許褰幃看
夜醉何妨秉燭遊錦里宣華思舊夢黃州定慧起新愁
何如歸伴徐公飲穩結一巢花上頭

和詠海棠韻

元李 祁

名花初發愛輕陰翠袖紅妝漸滿林步入錦帷香徑小
醉扶銀燭畫堂深妖嬈喜識春風面零落愁關夜雨心

多幸鳳凰池上客為抽勞思寫清吟

垂絲海棠

明
瞿佑

媚媚春風拂苑牆天機呈巧織仙裳玉欄斜搭酣春睡
銀燭高烧照晚妝華屋雨寒愁緒亂綺窗日暖唾茸香
詩成倘有纖毫補願醉佳人錦瑟傍

周德章駙馬府賞海棠

明
程敏政

冥冥花霧擁迴廊冉冉猩紅隔畫牆按譜更誰爭有韻
失評空自說無香莫燒銀燭驚春夢好障丹紗護曉妝

仙種北來初識面
臨風擽醉九霞觴

七言排律

畫海棠圖

元馬祖常

石家五尺珊瑚樹
海國千房火齊珠
風雨春寒圍錦護
豔陽天暖倚欄扶
浣時應貯芙蓉水
香處重熏翡翠爐
紅膩不隨蜂背蝕
粉勻終為蝶身敷
歲蕤綵纈盤仙綬
襞積雲羅落舞襦
青帝化成非幻有
杜陵吟老却知無
催開每賴斟鸚鵡
吹落還因唱鷓鴣
曾見赤城花亞蘂

丹鉛此去不須圖

五言絕句

海棠

宋
宋 祁

薄暝霞烘爛平明露濕鮮
長衾繡作地密帳錦為天

七言絕句

對花呈幕中

唐
高 駢

海棠初發去春枝
首唱曾題七字詩
今日能來花下飲
不辭頻把使頭旗

蜀中賞海棠

唐 鄭谷

濃淡芳春滿蜀鄉
半隨風雨斷鶯腸
浣花谿上堪惆悵
子美無心為發揚

海棠

唐 吳融

雪綻霞鋪錦水頭
占春顏色最風流
若教更近天街種
馬上多逢醉五侯

海棠谿

唐 薛濤

春教風景駐仙霞
水面魚身總帶花
人世不思靈卉異

競將紅纈染輕紗

展江亭海棠

宋韓維

占盡人間麗與華
白頭伴得醉流霞
誰將法錦翻新樣
紅綠裝成遍地花

海棠

宋蘇軾

東風嫋嫋泛崇光
香霧霏霏月轉廊
只恐夜深花睡去
高燒銀燭照紅妝

海棠

宋黃庭堅

海棠院裏尋春色日炙嫣紅滿院香不覺風光都過了
東窗渾為讀書忙

海棠

宋 陳與義

海棠默默要詩催日暮紫綿無數開欲識此花奇絕處
明朝有雨試重來

海棠屏

宋 朱子

蜀樹成行翠作圍花開時節更芳菲主人夢亦尋春去
栩栩深穿錦障飛

賞海棠

宋范成大

芳春隨分到貧家兒女多情惜歲華
聊為海棠修故事
去年燈燭去年花

其二

憶向宣華夜倚欄花光妍暖月光寒
如今塌颯嫌風露
且只銅瓶滿插看

曉寒

宋楊萬里

春光喚入百花叢寒力平欺兩鬢蓬
吹亂衆紅還復整

海棠却不怕春風

垂絲海棠

楊萬里

無波可照底須窺與柳爭嬌也學垂破曉驟晴天有意
生紅新曬一絢絲

海棠

宋僧惠洪

酒入香腮笑未知小妝初罷醉兒癡一枝柳外牆頭見
勝却千叢著雨時

同兒輩賦未開海棠

金元好問

翠葉輕籠豆顆勻，
臙脂濃抹蠟痕新。
殷勤留著花梢露，
滴下生紅可惜春。

其二

枝間新綠一重重，
小蕾深藏數點紅。
愛惜芳心莫輕吐，
且教桃李鬧春風。

臘月海棠

元尹廷高

尤物真能奪化工，
臘前偷泄數枝紅。
霜花不上燕支面，
強飾春妍嫁北風。

為浪谿題折枝海棠

元 歐陽玄

點綴春風只一枝
此花猶是半開時
更令老杜如今見
便是無情也賦詩

醉起

元 薩都拉

楊柳樓心月滿牀
錦屏繡褥夜生香
不知門外春多少
自起移燈照海棠

折枝海棠

元 楊維禎

金屋銀缸照宿妝
一枝分得錦雲鄉
梅郎底事多餘恨

怪煞珊瑚不肯香

海棠

元馬臻

殷紅含露臥朝寒疑是春工畫未乾
底事詩人吟不穩直須燒燭夜深看

西齋庭前海棠

明高啟

寂寥銀燭與金盤睡足簾前怯曉寒
不是詩人賞幽興雨中深院有誰看

海棠

明張新

雨滋霞襯入朱顏
月下疑從姑射還
最是春工多巧思
著將色在淺深間

秋海棠

明俞琬綸

春色先陰到海棠
獨留此種占秋芳
稀疎點綴猩紅小
堪佐黃花薦客觴

御定佩文齋詠物詩選卷三百十八

欽定四庫全書薈要卷一萬八千九百四十一

集部

御定佩文齋詠物詩選卷三百十九

桂花類

五言古

附長短句

詠桂樹

梁范雲

南中有八樹繁華無四時不識風霜苦安知零落期

詠桂

梁庾肩吾

新叢入望苑舊榦別層城倩視今移處何如月裏生

詠定林寺桂樹

北周 王褒

歲餘凋晚葉年至長新園月輪三五映鳥生八九飛

春桂問答

唐 王績

問春桂桃李正芳華年光隨處滿何事獨無花

其二

春桂答春華詎能久風霜搖落時獨秀君知不

古意

王績

桂樹何蒼蒼秋來花更芳自言歲寒性不知露與霜幽

人重其德徙植臨前堂連拳八九樹偃蹇二三行枝枝
自相糾葉葉還相當去來雙鴻鵠棲息兩鴛鴦榮蔭誠
不厚斤斧亦勿傷赤心許君時此意那可忘

詠桂

唐
李 白

世人種桃李多在金張門攀折爭捷徑及此春風暄一
朝天霜下榮耀難久存安知南山桂綠葉垂芳根清陰
亦可託何惜樹君園

謝陸處士杼山折青桂花見寄之什

唐
顏真卿

羣子遊杼山山寒桂花白綠萼含素萼採折自逋客忽
枉巖中詩芳香潤金石全高南越壺豈謝東堂策會愜
名山期從君恣幽覲

廬山桂

唐
白居易

偃蹇月中桂結根依青天天風繞月起吹子下人間飄
零委何處乃落匡廬山生為石上桂葉如剪碧鮮枝幹
日長大根茱日牢堅不歸天上月空老山中年廬山去

咸陽道里三四千無人為移植得入上林園不及紅花
樹長栽溫室前

比聞龍門敬善寺有紅桂樹獨秀伊川嘗于江
南諸山訪之莫致陳侍御知予所好因訪剡
谿樵客得數株移植郊園衆芳色沮乃知敬
善所有是蜀道苒草徒得嘉名因賦是詩兼

贈侍御

唐
李德裕

昔聞紅桂枝獨秀龍門側越叟移數株周人未嘗識平

生愛此樹攀翫無由得君子知我心因之為羽翼豈煩
嘉客譽且就清陰息來自天姥岑長疑翠嵐色芳芬世
所絕偃蹇枝漸直瓊葉潤不凋珠英粲如織猶疑翡翠
宿想待鸛鸞食寧止暫淹留終當更封殖

小桂

唐
陸龜蒙

諷賦輕八植擅名方一枝才高不滿意更自寒山移宛
宛別雲態蒼蒼出塵姿煙歸助華杪雪點迎芳蕤青條
坐可結白日如奔螭諒無剗翦憂即是蕭森時洛浦雖

有蔭騷人聊自怡終為濟川楫豈在論高卑

小桂

唐皮日休

一子落天上生此青壁枝欵從山之幽斲斷雲根移勁
挺隱珪質盤珊綆油姿葉彩碧髓融花狀白毫蕤稜層
立翠節偃蹇縈青螭影澹雪霽後香汎風和時吾祖在
月竈孤貞能見怡願老君子地不敢辭喧卑

謝人寄雙桂

宋歐陽修

有客賞芳叢移根自幽谷為懷山中趣愛此巖下綠曉

露秋暉浮清陰藥欄曲更待繁花白邀君弄芳馥

桂

宋曾肇

團團桂叢孤枝葉寒更媚託根庭宇間自有幽人致何必問嫦娥青雲借餘地

木犀古風

宋劉子翬

化工吝幽香斑斑被花木氤氲寒巖桂高韻蓋羣馥無人盡日芳守志何幽獨士介恥求知女貞慙自鬻淒涼楚山秋樛枝吐金粟淺水暎輕明微颺發含蕾樓端靜

忽聞馬上遙相逐，踟躕為延佇。但見林巒綠，瓶罌誰折。
贈清芬，閱廬屋久處，不自知。乍至彌鬱郁，客悲芳歲暮。
夢繞寒谿曲，長吟小山詞。古意恐難復。

飲錢二孔周宅桂花下

明王寵

嘉樹陰團團，團團露華白。本自招搖山，植君青霞宅。不
意凌寒姿，占此瑤墀隙。高枝挂珠網，卑條敷綺席。萋萋
布葉陰，茸茸吐花積。風飄遠近香，月映盈虧魄。既集佳
麗人，亦招隱淪客。幸承金樽薦，親勞玉腕摘。歌曲出瓊

瓏舞袖隨寬窄條繁每冒釵花落常點額戲羽必成雙
棲禽無單隻及此芳菲時荷君千金惜不醉且淹留看
朱已成碧

七言古

桂

宋
毛滂

玉階桂影秋綽約天空為捲浮雲幕嬋娟醉眠水晶殿
老蟾不守餘花落蒼苔忽生霜月裔仙芬淒冷真珠夢
娟娟石畔為誰妍香霧著人清入膜夜深醉月寒相就

茶蘼却作傷心瘦，弄雲仙女淡紵衣。
煙裙不著鴛鴦繡，眼中寒香誰同惜。
冷吟徑召梅花魄，小蠻為洗玻璃杯。
晚來秋甕蒲萄碧。

以玉山亭館分題得金粟影

元顧瑛

飛軒下瞰芙蓉渚，檻外幽花月中吐。
天風寂寂吹古香，清露泠泠濕秋圃。
雲梯萬丈手可攀，居然夢落清虛府。
庭中擣藥玉兔愁，樹下乘鸞素娥舞。
瓊樓玉殿千娉婷，中有矍仙淡睂宇。
問我西湖舊風月，何似東華軟塵土。

寒光倒落影娥池的皦明珠承翠羽但見山河影動搖
獨有清輝照今古覺來作詩思茫然金粟霏霏下如雨

五言律

桂

唐
李嶠

未植銀宮裏寧移玉殿幽枝生無限月花滿自然秋
俠客條為馬仙人葉作舟願君期道術攀折可淹留

巖桂

宋
劉子翬

涼颼振遠邨寂寞度清芬山路不知處月窗時夜聞孤

根寒抱石落子半飄雲袖手空延佇無才可賦君

詠巖桂

宋朱子

亭亭巖下桂歲晚獨芬芳葉密千層綠花開萬點黃天
香生淨想雲影護仙妝誰識王孫意空吟招隱章

木犀

宋許月卿

詩到黃初上高標不肯唐分封在香國筮仕得黃裳錦
畫纍金印瑤英案玉皇黃香天下士誰得並清芳

桂花

元倪瓚

桂花留晚色簾影淡秋光靡靡風還落菲菲夜未央玉
繩低缺月金鴨罷焚香忽起故園想泠然歸夢長

詠桂

明
申時行

巖壑同棲處風霜獨秀時暗飄靈隱粟高擢廣寒姿露
氣侵衣袂天香撲酒卮桂叢吾自密不負小山期

五言排律

月中桂樹

唐
顧封人

芬馥天邊桂扶疎在月中能齊大椿長不與小山同皎

皎舒華色亭亭麗碧空
虧盈寧委露搖落不關風
歲晚花應發春餘質詎豐
無因遂攀賞徒欲望青蔥

華州試月中桂

唐張喬

與月轉鴻濛扶疎萬古同
根非生下土葉不墮秋風
每以圓時足還隨缺處空
影高羣木外香滿一輪中
未種丹霄日應虛玉兔宮
何當因羽化細得問玄功

幽人折芳桂

唐闕名

厚地生芳桂遙林聳幹長
葉開風裏色花吐月中光
曙

鳥啼餘翠幽人愛早芳動時垂露滴攀處拂衣香入調
聲猶苦孤高力自強一枝終是折榮耀在東堂

七言律

八月十七日天竺山送桂花分贈元素

宋
蘇軾

月缺霜濃細藥乾此花元屬桂堂仙鷺峰子落驚前夜
蟾窟枝空記昔年破裊高僧憐耿介練裙谿女鬪清妍
願公採擷紉幽佩莫遣孤芳老澗邊

木犀初發呈張功甫

宋 楊萬里

塵世何曾識桂林花仙夜入廣寒深移將天上衆香國
寄在梢頭一束金露下風高月當戶夢回酒醒客聞砧
詩情惱得渾無賴不為龍涎與水沈

昨日訪子上不遇裴回庭砌觀木犀而歸再以
七言乞數枝

楊萬里

昨攜兒輩叩雲關繞遍巖花恣意看苔砌落深金布地
水沈蒸透粟堆盤寄詩北院賒秋色供我西窗當晚餐

小朵出叢須折却莫教拆破碧團樂

木犀花

元方夔

曾住仙山九折巖夜涼蘿荔挂衣衫月窺樽裏如相伴
人立花邊自不凡叢綠聯環瑤玉珮殘黃瑣骨現金函
枝空蟾窟今誰記猶道東陵繫舊銜

木犀

方夔

下土花中第一流移根自笑此生浮獨依上界清虛府
滿貯青冥沆瀣秋稜葉風翻低散亂蒼皮蟲蝕老雕鏤

醉來徑向高寒處自駕青鸞擁玉虬

其二

蒼蒼珠樹俯寒流析木津頭戲拍浮
褐鳳搏風朝紫極硯蟾滴露瀉清秋
返魂香倩羅裳貯礙月枝憑玉斧鉞
夜景未闌清入骨瀟瀟鱗甲臥凝蚪

月中桂花

元謝宗可

金粟如來夜化身嫦娥留得護冰輪
枝橫大地山河影根老層霄雨露春
長有天香飛碧落不教仙子種紅塵

折來何必吳剛斧還我凌雲第一人

紅木犀

明瞿佑

滴露研珠染素秋輕黃淡白總包羞量空金粟知難買
擊碎珊瑚惜未收仙友自傳丹竈術狀元須作錦衣遊
一枝擬問嫦娥乞管取花神暗點頭

桂

明申時行

招隱曾緣桂樹留追歡仍愛小山幽尊前露氣浮清漢
雲裏天香散碧秋老幹已分蟾窟種良宵堪續兔園遊

靈椿晚歲能相傍
花底何妨醉白頭

五言絕句

題殿前桂葉

唐
盧僎

桂樹生南海
芳香隔遠山
今朝天上見
疑是月中攀
崔九弟欲往
南山馬上口
號與別

唐
王維

城隅一分手
幾日還相見
山中有桂花
莫待花如霰

山中桂

唐
雍裕之

八樹拂丹霄四時青不凋秋風何處起先裊最長條

木犀

宋
朱子

喬木生夏涼芳蕤散秋馥未覺歲時寒扶疎方遶屋

東渚

朱子

小山幽桂叢歲暮靄佳色花落洞庭波秋風渺何極

木犀

宋
楊萬里

不是人間種移從月裏來廣寒香一點吹得滿山開

芳桂塢

明
高啟

欲攀淮南樹人去山寂寞嫋嫋涼風生疎花月中落

七言絕句

東城桂

唐白居易

子墮本從天竺寺根盤今在闔閭城當時應逐南風落
落向人間取次生

廳前桂

白居易

天台嶺上凌霜樹司馬廳前委地叢一種不生明月裏
山中猶較勝塵中

雙桂詠

唐陳陶

青冥結根易傾倒
沃洲山中雙樹好
琉璃宮殿無斧聲
石上蕭蕭伴僧老

寄陽朔友人

唐李郢

桂林雖產千株桂
未解當天影日開
我到月中收得種
為君移向故園栽

龍美初植松桂偶題

唐陸龜蒙

軒陰冉冉移斜日
寒韻泠泠入晚風
煙格月姿曾不改

至今猶似在山中

洞宮夕

陸龜蒙

月午山空桂花落
華陽道士雲衣薄
石壇香散步虛聲
杉露清泠滴棲鶴

小遊仙詩

唐
曹唐

焚香獨自上天壇
桂樹風吹玉簡寒
長怕嵇康乏仙骨
與將仙籍再尋看

天竺寺八月十五日夜桂子

唐
皮日休

金少卿人卷三
玉顆珊珊下月輪殿前拾得露華新至今不會天中事
應是嫦娥擲與人

木犀

宋鄧肅

雨過西風作晚涼連雲老翠入新黃清風一日來天闕
世上龍涎不敢香

詠木犀

宋謝無逸

淪雪凝酥點嫩黃薔薇清露染衣裳西風掃盡狂蜂蝶
獨伴天邊桂子香

次劉彥集木犀韻

宋朱子

衆芳搖落九秋期
橫出天香第一枝
莫似寒梅太孤絕
更教遙夜笛中吹

巖桂

宋范成大

越城芳徑手親栽
紅淺黃深次第開
不用小山招隱賦
身如強健日千迴

其二

一枝蕭索倚宣華
東苑香風屬內家
丹碧屠蘇銀燭照

平生奇絕象山花

少城園中惟有一株四明月桂特奇

凝露堂木犀

宋楊萬里

夢騎白鳳上青空
徑度銀河入月宮
身在廣寒香世界
覺來簾外木犀風

木犀

宋方岳

誰遣秋風開此花
天香來自玉皇家
鬱金裳浥薔薇露
知是仙人萼綠華

木犀

宋朱淑真

彈壓西風擅衆芳十分秋色為伊忙一枝淡貯書窗下
人與花心各自香

桂枝詞

元張雨

桂樹叢生枝婀娜
粼粟黃雲欲成朵
薰醒秋衣嬾下牀
金蟾嚙斷燒香鎖

紅木犀

明太祖

月宮移向日宮栽
引得輕紅入面來
好向煙霞承雨露
丹心一點為君開

其二

秋入幽巖桂影圓
香心粟粟照林丹
應隨王母瑤池宴
染得朝霞下廣寒

涼夜

明
高 啟

一聲遠笛數聲砧
月滿江城夜正深
坐據胡牀愛涼思
空階移盡桂花陰

直房聞桂香

明
史 謹

松陰池館畫偏涼
何處飄來桂子香
起傍雕闌看秋色

廣寒宮殿近昭陽

田人送桂花有懷同庵法兄

明僧德祥

上清宮裏花間殿
天竺山中月下臺
兩地舊遊同悵望
田家人送一枝來

仙桂曲題月娥帖和蓀谷韻

明崔孤竹

碧落迢迢鸞路長
天風吹送桂花香
玉簫歸去瑤壇上
羅襪寒生一寸霜

御定佩文齋詠物詩選卷三百十九

欽定四庫全書薈要卷一萬八千九百四十二集部

御定佩文齋詠物詩選卷三百二十

玉蘭花類

五言排律

玉蘭花

明

王世貞

暫藉辛夷質仍分薝蔔光
微風催萬舞好雨淨千妝
月向瑤臺並春還錦帳藏
高枝凝漢掌豔藥勝唐昌
神女曾捐珮宮妃欲試香
誰為後庭奏一曲按霓裳

七言律

玉蘭

明文徵明

綽約新妝玉有輝
素娥千隊雪成圍
我知姑射真仙子
天遣霓裳試羽衣
影落空階初月冷
香生別院晚風微
玉環飛燕元相敵
笑比江梅不恨肥

玉蘭花

明王世貞

南國風流曲未闌
開簾一笑萬花攢
霓裳夜色團瑤殿
露掌晴輝散玉盤
自是藍田貽別種
不同湘浦怨春寒

唐昌觀裏誇如雪，爭似儂家幾樹看。

玉蘭

明
陸樹聲

蔥蘢芳樹雨初乾，樽酒花前洽笑歡。
日晃簾櫳晴噴雪，風迴齋閣氣生蘭。
參差玉佩排空出，爛熳香鱗擁醉看。
自是東君苦留客，莫教絃管易吹殘。

七言絕句

玉蘭

明
睦石

霓裳片片舞妝新，束素亭亭玉殿春。
已向丹霞生淺暈，

故將清露作芳塵

御定佩文齋詠物詩選卷三百二十

欽定四庫全書薈要卷一萬八千九百四十三集部

御定佩文齋詠物詩選卷三百二十一

丁香花類

五言古

丁香

唐
杜甫

丁香體柔弱亂結枝猶墊細葉帶浮毛疎花披素豔深
裁小齋後庶近幽人占曉墮蘭麝中休懷粉身念

五言律

賦得池上雙丁香樹

唐錢起

得地移根遠交柯繞指柔
露香濃結桂池影鬪蟠虬
黛葉輕筠綠金花笑菊秋
何如南海外雨露隔炎洲

七言絕句

丁香

唐陸龜蒙

江上悠悠人不問十年雲外醉中身
殷勤解却丁香結從放繁枝散誕春

御定佩文齋詠物詩選卷三百二十一

欽定四庫全書薈要卷一萬八千九百四十四集部

御定佩文齋詠物詩選卷三百二十二

夜合花類

五言古

合歡

晉楊方

南鄰有奇樹承春挺素華豐翹被長條綠葉蔽朱柯因
風吐徽音芳氣入紫霞我心羨此木願從著余家夕得
遊其下朝得弄其葩爾根深且固余宅淺且滲移植良

無期歎息將如何

夜合

宋韓琦

俗人之愛花重色不重香吾今得真賞以矯時之常所
愛夜合者清芬踰衆芳葉葉自相對開斂隨陰陽不慚
歷草滋獨擅堯階祥得此合歡名憂忿誠可忘茸茸紅
白姿百和從風颺沈水燎庭檻薰陸芬纓裳彌月固未
歇況茲夏景長凡目不我貴馥烈徒自將仲尼失滅明
史遷疑子房以貌不以行舉世同悲傷予欲先馨德羣

豔孰可方直饒妖牡丹須讓花中王

合歡木

元
吳師道

合歡愛佳名矧復知昏旦淮土產特多蔥蘢蔭溝岸離
離青葉解冉冉紅茸散靜和宿露卷動與微風戀物意
豈悅人和樂自堪翫蹇予寡所諧觸事多忿悵亦擬學
嵇生植根向庭畔

五言律

附小律

題合歡花

唐
李頎

開花復卷葉豔眼又驚心
蝶遶西枝露風披東榦陰黃
衫漂細葉時拂女郎砧

夜合

唐元稹

綺樹滿朝陽融融有露光
雨多疑濯錦風散似分妝
葉密煙蒙火枝低繡拂牆
更憐當暑見留詠日偏長

七言律

玉堂合歡花初開鄭潛昭率同院賦詩次韻

元稹

一樹高花冠玉堂知時舒卷欲雲翔馬嘶不動遊纓聳
雉尾初開翠扇張舊渴未須餐玉屑嘉名端合紀青裳
雲窗霧冷文書靜留取餘清散遠香

崔豹古今注青裳一名合歡

五言絕句

合歡

明于若瀛

一莖兩三花低垂泣朝露開簾弄幽色時有香風度
七言絕句

閨婦

唐白居易

斜凭繡牀愁不動紅綃帶緩綠鬟低遼陽春盡無消息
夜合花前日又西

合昏

宋韓琦

合昏枝老拂簷牙紅白開成蘸暈花最是清香合蠲忿
累旬風送入窗紗

京城雜詠

元歐陽玄

白玉堂前夜合花高高綠樹散朱霞朝來如見唐人畫
繫著誰家白鼻騮

遊仙詩

明
葉小鸞

可是初逢夢綠華
瓊樓烟月幾仙家
坐中聽徹涼州曲
笑指窗前夜合花

御定佩文齋詠物詩選卷三百二十二

欽定四庫全書薈要卷一萬八千九百四十五

集部

御定佩文齋詠物詩選卷三百二十三

紫薇花類

五言古

紫薇

唐楊於陵

晏朝受明命維夏走天衢
逮茲三伏候自駕萬里途
省躬既跼蹐結思多煩紆
簿領幸無事宴體誰與娛
內齋有佳樹雙植分庭隅
綠葉下成幄紫花紛若鋪
攜霞晚

舒豔凝露朝垂珠炎沴盡方鑠幽姿閒且都天桃固難
匹芍藥寧為徒懿此時節久詎同光景驅陶甄試一致
品彙乃散殊濯質非受采無心那得朱粵予久羈旅留
賞益踟躕通夕靡云倦西南山月孤

奉和侍郎二丈翫郡齋紫薇花十四韻

楊於陵

幾年丹霄上出入金華省暫別萬年枝看花桂陽嶺南
方足奇樹公府成佳境綠陰交廣除明豔透蕭屏雨餘

人吏散燕語簾櫳靜懿此含晚芳脩然忘簿領紫茸垂
組綬金縷攢鋒穎露溥暗傳香風輕徐就影茸弱多意
思從容占時景得地在侯家移根近仙井開樽好凝睇
倚瑟仍回頸遊蜂駐綵冠舞鶴迷煙頂興生紅藥後愛
與甘棠並不學天桃姿浮勞在俄頃

五言律

紫薇花

唐
劉禹錫

明麗碧天霞
丰茸紫綬花
香聞荀令宅
豔入孝王家
幾

歲自榮辱高情方歎嗟有人移上苑猶是占年華

紫薇

明薛蕙

紫薇開最久爛熳十旬期夏日逾秋序新花續故枝
楚雲輕掩冉蜀錦碎參差臥對山窗下猶堪比鳳池

七言律

紫薇

唐白居易

紫薇花對紫薇翁名目雖同貌不同獨占芳菲當夏景
不將顏色託春風潯陽官舍雙高樹興善僧庭一大叢

何似蘇州安置處花堂欄下月明中

臨發宗讓宅紫薇

唐
李商隱

一樹濃姿獨看來秋庭暮雨類輕埃不先搖落應有待
已欲別離休更開桃綬含情依露井柳綿相憶隔章臺
天涯地角同榮謝豈要移根上苑栽

五言絕句

平望夜泊

明
王穉登

店傍栽紫薇顏色闌江霞我家庭下樹歸日正開花

七言絕句

紫薇花

唐
白居易

絲綸閣下文章靜
鐘鼓樓中刻漏長
獨坐黃昏誰是伴
紫薇花對紫薇郎

見紫薇花憶微之

白居易

一叢閣淡將何比
淺碧籠裙襯紫巾
除却微之見應愛
人間少有別花人

紫薇花

唐
杜牧

曉凝瑞露一枝新不占園中最上春桃李無言又何在
向風偏笑豔陽人

閣下暮春

宋王禹偁

詔書稀少日何長閒枕通中睡一場院吏報來丞相出
紫薇花影上東廊

次韻錢穆父紫薇花

宋蘇軾

折得芳蕤兩眼花題詩相報字橫斜篋中尚有絲綸句
坐覺天光照海涯

入直召對選德殿賜茶而退

宋周必大

綠槐夾道集昏鴉
勅使傳宣坐賜茶
歸到玉堂清不寐
月鈎初上紫薇花

紫薇

宋楊萬里

晴霞豔豔覆蒼牙
絳雪霏霏點砌沙
莫管身非香案吏
也移牀對紫薇花

凝露堂前紫薇花
兩株每自五月盛
開九月乃

衰

楊萬里

似癡如醉弱還嘉
露壓風欺分外斜
誰道花無紅百日
紫薇長放半年花

紫薇

宋
劉克莊

風標雅合對詞臣
暎砌窺窗伴演綸
忽發一枝深谷裏
似知茅屋有詩人

和省郎杜德常
清明三絕兼簡王君實
藝林

元
宋
聚

閒門景物苦無涯
柳拂青絲杏襯霞
蘊藉仙郎誰得似

官曹常對紫薇花

題石簪學士圖

明徐霖

歸來廢馬踏堤沙回首彤樓路漸賒
遙想禁門金鎖合一庭月浸紫薇花

御定佩文齋詠物詩選卷三百二十三

欽定四庫全書薈要卷一萬八千九百四十六集部

御定佩文齋詠物詩選卷三百二十四

木蘭花類

五言律

陳秀才庭際木蘭

唐方干

昔見初栽日
今逢成樹時
存思心更感
遠看步還遲
蝶舞搖風葉
鶯啼含露枝
徘徊不忍去
應與醉相宜

五言排律

題靈祐上人法華院木蘭花

唐 劉長卿

庭種南中樹年華幾度新已依初地長獨發舊園春
暎日成華蓋搖風散錦茵色空榮落處香醉往來人
菡萏千燈徧芳菲一雨均高柯倘為楫渡海有良因

五言絕句

木蘭

宋 鄭俠

未識春風面先聞樂府名洗妝儂出塞進艇客登瀛

七言絕句

戲題木蘭花

唐白居易

紫房日照牀脂垢素豔風吹膩粉開
怪得獨饒脂粉態
木蘭曾作女郎來

題令狐家木蘭

白居易

膩如玉指塗朱粉
光似金刀剪紫霞
從此時時春夢裏
應添一樹女郎花

木蘭花

唐李商隱

洞庭波冷曉侵雲
日日征帆送遠人
幾度木蘭舟上望

不知元是此花身

木蘭

宋張芸叟

石上紅花低照水
山頭翠篠細含煙
天生一本徐熙畫
只欠鷓鴣相對眠

春日閒居

明王虞鳳

濃陰柳色罩窗紗
風送爐煙一縷斜
庭草黃昏隨意綠
子規啼上木蘭花

御定佩文齋詠物詩選卷三百二十四

欽定四庫全書薈要卷一萬八千九百四十七

集部

御定佩文齋詠物詩選卷三百二十五

蠟梅花類

七言古

蠟梅一首贈趙景貺

宋蘇軾

天公點酥作梅花此有蠟梅禪老家蜜蜂採花作黃蠟
取蠟為花亦其物天工變化誰得知我亦兒嬉作小詩
君不見萬松嶺上黃千葉玉蘂檀心兩奇絕醉中不覺

度千山夜聞梅香失醉眠歸來却夢尋花去夢裏花仙
覓奇句此間風物屬詩人我老不飲當付君君行適吳
我適越笑指西湖作衣鉢

蠟梅

宋 陳與義

智瓊額黃且勿誇回眼視此風前葩家家融蠟作杏蒂
歲歲逢梅是蠟花世間真偽非兩法映日細看真是蠟
我今嚼蠟已甘腴況此有韻蠟不如只愁繁香欺定力
薰我欲醉須人扶不辭花前醉倒臥經月是酒是香君

試別

五言律

蠟梅

宋楊萬里

栗玉圓雕蕾金鐘細著行
來從真蠟國自號小黃香
夕吹撩寒馥晨曦透暖光
南枝本同姓喚我作他楊

七言律

蠟梅

元耶律楚材

越嶺仙姿迥異常
洞庭春染六銖裳
枝橫碧玉天然瘦

卷三 五十五
蕾破黃金分外香
反笑素英渾淡抹
却嫌紅豔太濃妝
臨風浥此薔薇露
醉墨淋漓寄渺茫

五言絕句

戲詠蠟梅

宋
黃庭堅

金蓓鎖春寒
惱人香未展
雖無桃李顏
風味極不淺
其二

體薰山麝臍
色染薔薇露
披拂不滿襟
時有暗香度

黃梅

黃庭堅

黑色深宜晚生香故觸人不施千點白別作一家春

同家弟賦蠟梅

宋陳與義

朱朱與白白著意待春開那知洞房裏已傍額黃來

其二

韻勝誰能舍色莊那得親朝陽一暎樹到骨不留塵

其三

黃羅作廣袂絳帳作中單人間誰敢著留得護春寒

其四

一花香十里更值滿枝開承恩不在貌誰敢鬪香來

蠟梅

陳與義

花房小如許銅切黃金塗中有萬斛香與君細細輸

其二

來從底處所黃露滿衣濕緣慙翻得憐亭亭倚風立

其三

奕奕金仙面排行立曉晴殷勤夜來雪少住作珠璣

七言絕句

和王立之蠟梅

宋晁沖之

茅簷竹塢兩幽奇
岸幘尋花醉亦知
崖蜜已成蜂去盡
夜寒惟有露房垂

從張仲謀乞蠟梅

宋黃庭堅

聞君寺後野梅發
香蜜染成官樣黃
不擬折來遮老眼
欲知春色到池塘

蠟梅

宋晁補之

恐是酴醾染得黃
月中清露滴來香
定知何遜牽詩興

借與穿簾一點光

蠟梅

宋楊萬里

蜜蜂底物是生涯
花作餽糧蠟作家
歲晚畧無花可採
却將香蠟吐成花

蠟梅

楊萬里

天向梅梢別出奇
國香未許世人知
殷勤滴蠟絨封却
偷被霜風折一枝

其二

江梅珍重雪衣裳薄相紅梅學杏裝渠獨小參黃面老
額間豔豔發金光

蠟梅

宋謝翱

冷豔清香受雪知雨中誰把蠟為衣
蜜房做就花枝色留得寒蜂宿不歸

謝王巨川惠蠟梅因用其韻

元耶律楚材

雪裏冰枝破冷金前邨籬落暗香侵
令人多謝王公子分惠幽芳寄好音

御定佩文齋詠物詩選卷三百二十五

欽定四庫全書薈要卷一萬八千九百四十八集部

御定佩文齋詠物詩選卷三百二十六

山茶花類

五言古

春晚山茶始開示德衡弟

元 蒲道源

山茶本冬花憔悴遂開晚
儕輩鬪芬芳已獨尚
息偃及茲春事深
渥丹始赫烜
參列姚魏前
正色無婉婉
因之觀我生平
昔非驕蹇
衡門自棲遲
臨老遇推挽
朱紫皆

少年迹親心自遠
華顛豈懷榮
田里幸得返
功名船上灘
歲月輪下坂
撫樹三歎息
歲寒同繾綣

白茶

元朱德潤

秋高銀河瀉
碧宇淨如洗
飛仙自天來
幻作白茶蘂
清香不自媚
迴出山谷底
盈盈雙玉環
婉立庭戶裏
風霜非故林
雨露結新意

七言律

山茶

宋劉克莊

青女行霜下曉空山茶獨殿衆花叢不知戶外千林縞
且看盆中一本紅性晚每經寒始坼色深那愛日微烘
人言此樹尤難養暮溉晨澆自課童

十二月十八日海雲賞山茶

宋 范成大

追趁新晴管物華馬蹄鬆快帽簷斜天南臘盡風晞雪
冰下春來水激沙已報主林催市柳仍從掌故問山茶
豐年自是歡聲沸更著牙前畫鼓撾

月丹

元 郝經

小艇移來江漲橋盤盤矮矮格仍嬌丹霞皺月瑯紅玉
香霧凝春剪絳綃一種是花偏富貴三冬無物比妖嬈
廣寒記憶曾攀折滿殿光搖照紫霄

王承宣致月丹一本云山茶大者曰

月丹又大者
曰照殿紅

五言絕句

山茶

宋
梅堯臣

南國有嘉樹華居赤玉杯曾無冬春改常冒霰雪開

山茶

明
黎擴

葉苦寒摧綠花愁雪妬紅自知榮適晚不敢恨春風

七言絕句

紅茶花

唐司空圖

景物詩人見即誇豈憐高韻說紅茶牡丹枉用三春力
開得方知不是花

邵伯梵行寺山茶

宋蘇軾

山茶相對阿誰栽細雨無人我獨來說似與君君不會
爛紅如火雪中開

山茶花

宋陶弼

江南池館厭深紅
零落山煙山雨中
却是北人偏愛惜
數枝和雪上屏風

其二

淺為玉茗深都勝
大白山茶小海紅
名譽漫多朋援少
年年身在雪霜中

山茶

宋俞國寶

花近東谿居士家
好攜尊酒款攜茶
玉皇收拾還天上

便恐筠陽無此花

其二

玉潔冰寒自一家
地偏驚對此山茶
歸來不負西遊眼
曾識人間未見花

阻風南露筋過羅漢寺登樓看山茶

元薩都拉

野寺尋春酒未醒
不知幾日過清明
小闌干外東風急
一樹山茶落晚晴


山茶

明張新

臘脂染就絳裙欄
琥珀妝成赤玉盤
似共東風解相識
一枝先已破春寒



御定佩文齋詠物詩選卷三百二十六



總校官庶吉士臣侍朝

校對官庶吉士臣嚴福

謄錄監生臣徐士俊

欽定四庫全書薈要

集部

御定詠物詩選卷三百

二十七至
三十五

詳校官原任主事臣李斯咏

欽定四庫全書薈要卷一萬八千九百四十九 集部

御定佩文齋詠物詩選卷三百二十七

梔子花類

五言古

詠牆北梔子

齊謝朓

有美當階樹霜露未能移
金蕢發朱采映日以離離
幸賴夕陽下餘景及西枝
還思照綠水君堦無曲池
餘榮未能已晚實猶見奇
復留頃筐德君恩信未貲

摘同心梔子贈謝娘因附此詩

梁劉令嫺

兩葉雖為贈交情永未因同心何處恨梔子最關人

梔子花

宋曾肇

林蘭擅孤芳性與凡木異不受雪霰侵自足中和氣欲知清淨身即此林間是

五言律

梔子

唐杜甫

梔子比衆木人間誠未多於身色有用與道氣相和紅
取風霜實青看雨露柯無情移得汝貴在映江波

七言絕句

劉平甫分惠水梔小詩為謝

宋朱子

何處飛來蒼筤林老枝樛屈更蕭慘淒涼杜老江頭句
坐對行吟得自箴

梔子

宋朱淑真

一根曾寄小峯巒蒼筤香清水影寒玉質自然無暑意

更宜移就月中看

梔子

宋
蔣梅

清淨法身如雪瑩肯來林下現孤芳對花六月無炎暑
省熱銅匱幾炷香

次韻悅允元見寄

明
朱右

於越山中謝傳家舊時池館似東嘉繼公幽隱經行處
蒼筤新開一樹花

梔子花題畫

明
豐坊

金鴨香消夏日長
拋書高臥北窗涼
晚來驟雨山頭過
梔子花開滿院香

梔子

明
于若瀛

萱花蒼筤亞枝柔
夏豔春嬌取次收
麗朶乍開金谷障
冷香亂墮水晶毬

御定佩文齋詠物詩選卷三百二十七

欽定四庫全書薈要卷一萬八千九百五十

集部

御定佩文齋詠物詩選卷三百二十八

辛夷花類

七言古

初入京寓天界西閣對辛夷花懷徐七記室

明
高啟

去年寺裏開辛夷君來憶我曾題詩今年我來君已去
思君還對花開時欲尋花下君行迹日暮空庭古苔碧

殷勤把酒問花枝
看過春風幾行客

五言律

辛夷花

唐
李德裕

昔年將出谷
幾日對辛夷
倚樹憐芳意
攀條惜歲滋
清陰雖暫憩
秀色正堪思
只待揮金日
殷懃泛羽卮

七言律

揚州看辛夷花

唐
皮日休

臘前千朶亞芳叢
細膩偏勝素捺功
螭首不言披曉雪

麝臍無主任春風一枝拂地成瑤圃數樹參庭是藥宮
應為當時天女服至今猶未放全紅

和揚州看辛夷花次韻

唐
陸龜蒙

柳疎梅墮少春叢天遣花神別致功高處朵稀難避日
動時枝弱易為風堪將亂蘂添雲肆若得千株便雪宮
不待羣芳應有意等閒桃杏即爭紅

遊蔣山題辛夷花寄陳奉禮

宋
徐鉉

今歲遊山已恨遲山中仍喜見辛夷簪纓且免全為累

桃李猶堪別作期
晴後日高偏照灼
晚來風急漸離披
山郎不作同行伴
折得何由寄所思

五言絕句

辛夷塢

唐裴迪

綠堤春草合
王孫自留翫
況有辛夷花
色與芙蓉亂

辛夷

明陳繼儒

春雨濕窗紗
辛夷弄影斜
曾窺江夢彩
筆筆忽生花

七言絕句

題靈隱寺紅辛夷花戲酬光上人

唐
白居易

紫粉筆含尖火焰紅
臙脂染小蓮花芳情鄉思知多少
惱得山僧悔出家

二辛夷

唐
李羣玉

狂吟亂舞雙白鶴
霜翎玉羽紛紛落
空庭向晚春雨微
欲斂寒香抱瑤萼

辛夷

唐
歐陽炯

含鋒新吐嫩紅芽勢欲書空映早霞應是玉皇曾擲筆
落來地上長成花

木筆花

唐
吳融

嫵如新竹管初齊粉膩紅輕樣可攜誰與詩人偎檻看
好於牋墨并分題

辛夷

明
馮文度

木筆花名映碧欄詞臣相對動毫端曉來似惹松煙滑
疑向春風詠牡丹

辛夷

明
張新

夢中曾見筆生花
錦字還將氣象誇
誰信花中原有筆
毫端方欲吐春霞

御定佩文齋詠物詩選卷三百二十八

欽定四庫全書薈要卷一萬八千九百五十一

集部

御定佩文齋詠物詩選卷三百二十九

繡毬花類

七言律

繡毬花次烏延廉使韻

元張昱

繡毬春晚欲生寒，滿樹玲瓏雪未乾。
落過楊花渾不覺，飛來蝴蝶忽成團。
釵頭嬾戴應嫌重，手裏閒拋却好看。
天女夜涼乘月到，羽輪偷駐碧欄干。

七言絕句

繡毬花

明謝榛

高枝帶雨壓雕欄
一帶千花白玉團
怪殺芳心春歷亂
捲簾誰向月中看

御定佩文齋詠物詩選卷三百二十九

欽定四庫全書薈要卷一萬八千九百五十二集部

御定佩文齋詠物詩選卷三百三十

棠梨花類

五言排律

追詠棠梨花十韻

唐
吳融

蜀地從來勝棠梨第一花更應無軟弱別自有妍華不
貴綃為霧難降綺作霞移須歸紫府駐合餌丹砂密暎
彈琴宅深藏賣酒家夜宜紅蠟照春稱錦筵遮連廟魂

樓望飄江宇，遶巴未饒酥。點薄兼妬雪，飛斜舊賞年。
斷新期，萬樹賒長安。如種得誰定，牡丹誇。

七言絕句

送王使君自楚移越

唐劉商

露冕行春向若耶，野人懷惠欲移家。
東風二月淮陰道，惟見棠梨一樹花。

以庭前海棠梨花一枝寄李十九員外

唐韓偓

二月春風澹蕩時
旅人虛對海棠梨
不如寄與星郎去
想得朝回正畫眉

碧瓦

宋范成大

碧瓦樓前繡幕遮
赤欄橋外綠谿斜
無風楊柳漫天絮
不雨棠梨滿地花

棠梨幽鳥

明張以寧

揚州舊夢隔天涯
曾醉春風阿那家
幽鳥豈知人事恨
依然啼殺野棠花

題畫

明
雷鯉

鳥外風煙古寺迴半帆倒挂夕陽來江天物色無人管
處處野棠花自開

題畫

明
唐寅

青藜拄杖尋詩處多在平橋綠樹中紅葉沒鞋人不到
野棠花落一谿風

古塘即事

明
張金

布穀聲中日又斜石橋流水兩三家鄉邨春色無人管

開盡棠梨幾樹花

棠梨

明
陸樹聲

滿樹棠梨錦作團
雙棲啼鳥鬪爭妍
邊徐生色依然好
贏得東風歲歲看

過孫山人故居

明
僧明秀

谿邊野竹暎寒沙
茆屋青山處士家
燕子歸來寒食雨
春風開徧野棠花

春歸

明
孟淑卿

落盡棠梨水拍堤淒淒芳草望中迷無情最是枝頭鳥
不管人愁只管啼

御定佩文齋詠物詩選卷三百三十

欽定四庫全書薈要卷一萬八千九百五十三集部

御定佩文齋詠物詩選卷三百三十一

玉蕊花類

五言古

玉蕊花

宋王琪

玉蕊生禁林地崇姿亦貴散漫陰谷中蓬茨復何異清
芬信幽遠素彩非妖麗蒼煙蔽山日瓊瑤為之晦歲久
自扶疎巖深愈凝邃請觀唐相吟俗眼無輕視

五言律

玉蕊花

唐
李德裕

玉蕊中天樹金閨昔共窺落英閒舞雪密葉乍低帷舊
賞煙霄遠前懽歲月移今來想顏色還似憶瓊枝

松花唐玉蕊花介甫謂之瑒花魯直謂之山礬
武昌山中多有之其葉可供染事土人用之

釀酒

宋
薛季宣

松綠吐瑤琨冷然郭外邨仙人來玉蕊文士立山礬芳

澤留絲素風流付酒尊莫言場酷似香處不勝繁

七言律

次楊子直使君韻

宋周必大

雪鹽冰絲結素華天孫初織費縑車
花開金谷空千種蕊疊瑤英自一家
下比山礬誰薄相上攀瓊木各雄夸
集仙翰苑須公等歸繼唐賢植此花

趙正則彥法司戶沿檄而歸玉蕊已過追賦車

字韻奉答

周必大

春深遊客競繁華
寶馬香輪帶麴車
不為來看招隱樹
有誰肯顧野人家
飛飛粉蝶須相映
皎皎銀蟾色共夸
今得審言詩勝畫
傳神何必趙昌花

五言絕句

玉蕊

唐
鄭谷

唐昌樹已荒
天意眷文昌
曉入微風起
春時雪滿牆

七言絕句

聞揚州唐昌觀玉蕊花
坼有仙人遊
悵然成二

絕

唐
嚴休復

味道齋心禱玉宸
魂銷眼冷未逢真
不如滿樹瓊瑤蕊
笑對藏花洞裏人

其二

羽車潛下玉龜山
塵界何由覩薜顏
惟有無情枝上雪
好風吹綴綠雲鬟

唐昌觀玉蕊花

唐
武元衡

琪樹年年玉蕊新
洞中長閉彩霞春
日暮落英鋪地雪

獻花無復九天人

唐昌觀玉蕊花

唐楊凝

瑤花瓊蕊種何年
簫史秦嬴向紫煙
時控彩鸞過舊邸
摘花持獻玉皇前

唐昌觀玉蕊花

唐劉禹錫

玉女來看玉蕊花
異香先引七香車
攀枝弄雪時回首
驚怪人間日易斜

其二

雪蕊瓊葩滿院春
衣輕步步不生塵
君平簾下徒相問
長伴吹簫別有人

唐昌觀玉蕊花

唐楊巨源

晴空素艷照霞新
香灑天風不到塵
持贈昔聞將白雪
蕊珠宮裏玉華春

同嚴給事聞唐昌觀玉蕊開近有仙過因成絕句二首

唐張籍

千枝花裏玉塵飛
阿母宮中見亦稀
應共諸仙鬪百草

獨來偷折一枝歸

其二

五色雲中紫鳳車
尋仙來到洞仙家
飛輪回處無蹤迹
惟有斑斑滿地花

唐昌觀玉蕊花

唐王建

一樹瓏璁玉刻成
飄廊點地色輕輕
女冠夜覓香來處
唯見階前碎月明

酬嚴給事玉蕊花

唐白居易

羸女偷乘鳳下遲洞中潛歌弄瓊枝不緣啼鳥春饒舌
青瑣仙郎可得知

惜玉蕊花有懷集賢王校書起 白居易

芳意將闌風又吹白雲離葉雪辭枝集賢讐校無間日
落盡瑤花君不知

玉蕊院真人降

唐元稹

弄玉潛過玉樹時不教青鳥出花枝的應未有諸人覺
只是嚴郎不得知

送汪太學遊江都

明 黃姬水

薔薇芍藥與茱萸無數芳
非傍酒壚惟有蕃釐仙觀裏
一枝玉蕊世間無

御定佩文齋詠物詩選卷三百三十一

欽定四庫全書薈要卷一萬八千九百五十四

集部

御定佩文齋詠物詩選卷三百三十二

山礬花類

七言古

題林周民山礬圖

明

許伯旅

山礬入畫古所少我昔見之倪瓚家問君何處得此本
水屋十月來春花東風著樹香滿雪長鬚滴露金粟結
一枝獨立霜霰餘已覺江梅是同列惜哉此物知者稀

深林大谷多所遺牧豎樵童爾何苦剪伐每同荊棘歸
林君本是鰲頭客高卧雲間人莫識酒酣揮袖卷新圖
一笑西山眼中碧

七言絕句

題高節亭邊山礬花一首

宋

黃庭堅

高節亭邊竹已空山礬獨自倚春風二三名士開顏笑
把斷花光水不通

山礬

黃庭堅

北嶺山礬取次開清風正用此時來平生習氣難料理
愛看幽香未擬回

御定佩文齋詠物詩選卷三百三十二

欽定四庫全書薈要卷一萬八千九百五十五

集部

御定佩文齋詠物詩選卷三百三十三

棟花類

七言絕句

淺夏獨行奉新縣圃

宋楊萬里

我來官下未多時
梅已黃深李綠肥
只怪南風吹紫雪
不知屋角棟花飛

寄友

元朱希晦

雨過谿頭鳥篆沙谿山深處野人家門前桃李都飛盡
又見春光到棟花

貞谿初夏

明邵亨貞

棟花風起漾微波野渡舟輕客自過沙上兒童臨水立
戲將萍藻飼黃鸞

暮春送客

明沈周

舊迹新痕酒滿衣東風紫棟又花飛金閭亭上偏無賴
春與行人并日歸

春暮

明孫一元

門開轆轤東風曉
酒熟牀頭無可人
聽盡雨聲渾不寐
棟花榆莢過殘春

寄曹學佺

明吳兆

幾年山水共閒遊
無日吟詩不唱酬
一卧故園春又暮
棟花零落漸谿頭

暮春閒居和蘆卿姪

明范汭

舍南舍北雨聲催
欸欸閒鷗逐隊來
欲買魚蝦喚江艇

棟花臨水葦門開

晚興

明
張宇初

晚來山色翠芙蓉
樹帶谿聲水接空
自是江南春雨久
柳陰啼鳥棟花風

御定佩文齋詠物詩選卷三百三十三

欽定四庫全書薈要卷一萬八千九百五十六

集部

御定佩文齋詠物詩選卷三百三十四

木棉花類

附槿花

七言絕句

曲池陪宴即事上竇中丞

唐

熊孺登

水自山阿繞座來
珊瑚臺上木棉開
欲知舉目無情罰
一片花流酒一桮

二月一日雨寒

宋

楊萬里

姚黃魏紫向誰賒
郁李櫻桃也沒些
却是南中春色別
滿城都是木棉花

潮惠道中

宋 劉克莊

春深絕不見妍華
極目黃茅際白沙
幾樹半天紅似染
居人云是木棉花

思明州

元 陳孚

毒蟲含弩滿汀沙
荒州深眠十丈蛇
遙望天邊紅似火
瘴雲飛落木棉花

嶺南雜錄

明 汪廣洋

石鼎微熏茉莉香
椰瓢滿貯荔枝漿
木棉花落南風起
五月交州海氣涼

古耶道中有懷

明 陳憲章

翠煙浮壟麥初齊
社樹青青獨鳥啼
何處相思不相見
木棉花下水門西

晚次安南呂塊站

明 許天錫

瓊雲歸路正匆匆
十里官亭坐晚風
何事最關孤客思

數聲啼鳥木棉紅

田家即事

明
唐時升

棟花穀穀柳毵毵犬吠西鄰餉麥蠶雨過木棉齊放葉
相邀作社到城南

附槿花

五言古

種槿花

元
陳高

東方有槿樹衣被代蠶桑舍西得閒園種之漫成行苗

生初夏時料理晨夕忙揮鋤向烈日灑汗成流漿培根
澆灌頻高者三尺強鮮鮮綠葉茂燦燦金英黃結實吐
秋繭皎潔如雪霜及時以收斂采采動盈筐緝治入機
杼裁剪為衣裳御寒類挾纊老稚免淒涼豪家植花卉
紛紛被垣牆于世竟何補爭先翫芬芳棄取一何異感
物增惋傷

御定佩文齋詠物詩選卷三百三十四